

M027: Von der Babylonischen Gefangenschaft

- 1,1 –[...] .
1,2 unde gebôt uns daz wir vore besæhen . daz wir in daz boese gevangnusse
 iecht komen .
1,3 dâ die Israhêle inne woneten . an den sich got gerochen habete .
1,4 daz selbe gevangnusse . daz bezeinchenet gewisse .
1,5 daz alle die gevangen sulen werden . die an disem lîbe âne buoze ersterben
 .

2,1 die Israhêle . noch doleten si manigen wêwen .
2,2 si hêten michel nôt . ez bezeinchenet den kûmftigen tôt .
2,3 diu bant diu si truogen . die wîle si gevangen wâren .
2,4 diu bezeinchent daz . des leiden tiuvels kraft .
2,5 wan der tiuvel alle die bindet . die er âne buoze vindet .
2,6 dannen was ditze gevangnusse vreislich . ez gêt ûf man unde wîp .
2,7 die in disem lîbe . mit der bôsheit belîbent .
2,8 die müezen gevangnusse dolen . in wirdet michel êre benomen .
2,9 si ne bekêren sich von [dem] unrehte widere . unser hêrre got [von] himele
 .
2,10 erbilget sich an dem jungesten tage . diz hât uns der prophête gesaget .

3,1 hier mite warnet unsich unser hêrre . noch bezeinchenet ez mêre .
3,2 ez meint alle die . die mit untriuwen woneten hier .
3,3 unde die bôsheit râtent . vruo unde spâte .
3,4 swenne si âne buoze hin varent . si müezen den selben lôn haben .
3,5 den die Israhêle habeten . dô si in dem gevangnusse woneten .
3,6 wellen aber wir an der buoze vaste bestân . sô mügen wir grôzen lôn hân .
3,7 denne sô helfent uns die sibenzic tage . daz wir ze genâden mügen varn .

4,1 nû haben wir gekôset von disen tagen . die erkennenet wole wîp unde man .
4,2 sô die sibenzic tage an gênt . sô leit man ein lop vile her .
4,3 daz lop heizet alleluia . daz lobet got den getriuwen .
4,4 daz lop sulen wir vermîden . alle die wîle .
4,5 sô die sibenzic tage werent . unde sulen genâde an got gern .
4,6 unde sulen grôze diumuot haben . ich wile iu ein ander rede sagen . waz
 daz
4,7 diutet . daz die israhêlischen liute .
4,8 giengen gevangen . diu sibenzic jâr alle .
4,9 daz was ein michel urteile . daz si diu sibenzic jâr muosen weinen .

- 4,10 vile manigen êwiclîchen tac . daz in nie genâde geschach .
- 5,1 diu bant bezeinchent uns daz wir sulen vûrhten di goteskraft .
5,2 uns bezeichnenent ouch die sibenzic tage . daz wir gote [unser] sünde klagen
.
5,3 unde sulen [in] [iemer] minnen . mit guotem willen .
5,4 wir sulen [in] bî unserm herzen haben . der propheta der uns daz vore
sagete .
5,5 er ist Hieremias genant . alsô stêt ez in den buochen gezalt .
5,6 er saget ez umbe daz . wan ez der heilige geist ûz sînem munde sprach .
5,7 er wiste niht mêr denne ein ander man . êr der heilige geist in sînen
lîchnamen kom .
- 6,1 von diu haben wir ein michel teil ze lobenne . den rîchen got ze himele .
6,2 sô stêt ez uns harte ebene . hier ze disem lebene .
6,3 unde ouch ze jener werlte . dar wir noch hûgen ze varenne .
6,4 hêten wir niht kristen namen . sô wære uns ûbel geschehen .
6,5 solten wir denne sünden . ze allen den stunten .
6,6 als wir vile dicke hân getân . sô müesen wir ein vreislîche buoze bestân .
6,7 ob wir kristene niht wâren . ich sage iu waz uns denne geschehe .
6,8 sô wære bezzer wâren wir niht geboren . wir gewûnnen als grôzen zorn .
6,9 als die Israhêle habeten . dô si in dem gevangnusse woneten .
- 7,1 nû hât uns got daz ze minnen getân . wir dürfen di langen buoze niht bestân
.
7,2 der sibenzic jâre . daz sage ich iu ze wâre .
7,3 des hât uns got erlâzen . ich sage iu wes wir geniezen .
7,4 daz wir kristene sîn genant . ich hân ez iu rehte gezalt .
7,5 diu buoze diu vûre stêt . ich sage iu die wârheit .
7,6 diu ist semfte ze dolen . des haben wir got ze lobenne .
7,7 daz sint sibenzic tage ze wâre . vûre diu sibenzic jâre .
- 8,1 haben wir gesündet sêre . klagen wir ez unserm hêrren .
8,2 komen wir ze buoze . unde wellen wir got dâr umbe grûezen .
8,3 sô werdent unser sünde niemer sô grôzlich . unser hêrre neme si über sich
.
8,4 ob wir si vûrebaz vermîden . sô mügen wir mit gote wole belîben .
8,5 von diu warnet uns der propheta vile rehte . beidiu hêrren unde knehte .
8,6 er reit ez von den Israhêlen . unde meinet den langen wêwen .
8,7 der iemer mêre wesen sol . daz in vûrhte wîp noch man .
8,8 den daz gevangnusse . bezeichnenet gewisse .
8,9 daz si gevangen wâren . daz bezeichnenet grôze quâle .
8,10 die vile unsæligen schare . die ze jungest ze helle müezen varn .